

Tekun, rajin berusaha rahsia graduan cemerlang

Oleh **Mohd Khidir Zakaria** - Mac 25, 2022 @ 12:32pm

bhnews@bh.com.my



Justin Lim, (berdiri kanan) dan Nur Amira Natasha, (berdiri kiri) bersama keluarga masing-masing selepas menerima anugerah pada Majlis Konvensyen Kali Ke-29 Politeknik Port Dickson.-Foto NSTP MOHD KHIDIR ZAKARIA

PORT DICKSON: Seramai 4,223 graduan Politeknik Port Dickson daripada lima sesi pengajian menerima diploma pada Majlis Konvensyen Kali Ke-29 yang berakhir petang semalam.

Dua pelajar terpilih menerima Anugerah Kecemerlangan Akademik dan Kokurikulum serta Anugerah Pengarah turut menerima wang tunai sebanyak RM1,000 seorang.

Justin Lim Kai Sheng, 26, yang berasal dari Alor Gajah, Melaka, menerima Anugerah Kecemerlangan Akademik Dan Kokurikulum lulusan Jun 2019 berkata, dia hanya menjalankan tanggungjawab sebagai pelajar yang mengambil jurusan Diploma Kejuruteraan Elektrik (Tenaga Hijau).

"Bagi saya, setiap apa yang kita lakukan, kita perlu buat bersungguh-sungguh kerana itu tanggungjawab kita sebagai pelajar. Saya turut menghargai jasa kedua ibu bapa serta pensyarah yang banyak memberi tunjuk ajar," katanya ketika ditemui di sini petang semalam.

Katanya, kenangan manis selama bergelar pelajar adalah menerima Anugerah Ketua Jabatan lima semester berturut-turut dengan gred purata 3.85.

"Ada yang bertanya rahsia di sebalik kejayaan ini dan saya rasa apa sahaja yang kita lakukan, kita sentiasa meletakkan kedua ibu bapa sebagai keutamaan," katanya anak ketika daripada empat beradik ini.

Tambahnya, dia sangat berbangga dengan kehadiran ibunya, Bok Thai Jee dan ayahnya, Lim Choo Kang yang meraikan hari bersejarah ini.

Justin berkata, buat masa ini dia bekerja di AFA Technologies Sdn Bhd di Melaka, sebagai Jurutera Automation Software dan baru sahaja melanjutkan pelajaran dalam jurusan Kejuruteraan Elektrik di Universiti Teknikal Malaysia Melaka (UTEM) secara separuh masa.

Seorang lagi penerima Anugerah Kecemerlangan Akademik Dan Anugerah Pengarah lulusan tahun 2020, Nur Amira Natasha Zairol, 23, cemerlang dalam Diploma Kejuruteraan Elektrik (Kecekapan Tenaga) dari Shah Alam, Selangor.

Menurutnya, rahsia kejayaan ialah sentiasa berusaha yang terbaik dalam apa juga bidang, selain aktif dalam kokurikulum.

"Apa sahaja tugas yang diberikan pensyarah, saya akan laksanakan sebaiknya dan ikhlas kerana itu memudahkan kita melakukan tanpa rasa ragu-ragu kerana setiap apa yang diarahkan.

"Mungkin kerana itu, Allah mudahkan untuk saya lakukan setiap tugas yang saya anggap sebagai tanggungjawab selagi kita bergelar pelajar," katanya yang kini sudah di tahun 2 pengajian di Universiti Tun Hussein Onn Malaysia (UTHM) dalam jurusan Kejuruteraan Elektronik.